



宛陵先生文集目錄卷第三十

送李密學亳州

送樊秀才歸安州

和李密學見懷

觀理蔬

哭尹師魯

泛舟和持國

荅持國示詩

送李轉運移京東

送庭老歸河陽

詠雙杏

和仲儀楸花

目昏

送韓太祝求醫

賦紅雀

持國遺食

捫虱得蚤

同道損遊西湖

送上虞孫簿

寄題金州處陰亭

石榴

七夕

同諸韓晚遊西湖

韓玉汝遺澄心紙

和仲儀麝香

和凌霄花

聞玉汝宿城北

夢過三陵

詠扇

送曼叔襄城尉

送吳給事移淮西

李密學寄亳州棗

九月五日夢永叔

尉氏南至京水及人脛

宋平叔郊外見迓

裴如晦赴河陽幕

送子華拜掃

送玉汝宰錢塘

得曾鞏附永叔書

追詠崔氏小園

宋中道快予生女

詠次道宅樓欄

詠秤

詠象子華邀賦

和答惠勤上人

答顯忠上人

送韓仲文奉使

送劉司勳奉使

和永叔秋懷見寄

同玉汝謁裴如晦

詠黃木芙蓉

二馬

和許發運詠影

寄題衢州萃賢亭

答楚僧智普

和鴨雛

有觀

目錄終

宛陵先生文集卷第三十

送李密學赴亳州

倦輸關內粟遂請潁川符治績可稱最士民將以
蘇譙郡君命重苦縣祖風殊仙檜留陰在甘棠即
化敷行舟通遠水候騎溢長衢他日人懷望煙雲
自滿湖

送樊秀才歸安州

開元有謫仙酒隱向安陸子嘗慕其人文字不拘
束月下每醉吟落紙輒數幅今當安陸歸白酒村
中熟一名猶未成雙親淚盈目切莫苦銜盃無心

不擇祿去去煙水間野禽嗥古木聞聲不得名將
投山舍宿此趣自可嘉非如走塵轂

依韻李密學合流河口見懷

二水交流抱閭井清潭幾曲自淵回已浮畫舸遙
遙去更愛雙鷺泛泛來

觀理蔬

野薺不堪食蕪菁今正肥夏畦人所病老圃方可
窺乳雀爭啣蝶鳴鴉各護兒於陵豈復有空學桔
槔為

哭尹師魯

謫死古來有無如君甚寃文章不世用器業欲誰
論野鳥災王傳招辭些屈原平生洛陽友零落幾
人存

泛舟和持國

綠源去未窮夾岸樹濛濛弱蔓低侵水殘芳不隱
叢浣衣思越婦折笋擬江童薄暮迴舫處潭魚動
鏡中

欲晚訪韓持國忽道損見過不克往持國

示詩因答

西雲沉日脚命僕駕我車我車已在庭有客方詣

廬談笑不覺夕雞黍且煩渠重約勿以怪但當摘
園蔬

送京西轉運李刑部移京東轉運 鈇

列藩環王都遂分東西道統制連別京守臣多碩
老外臺持權綱才具必美好公今且更踐入用頗
不早乃令山東粟餉饋歲可保古路趨汶陽長風
吹綠草

送李庭老歸河陽

五月馳乘車歸心豈畏暑道上多清陰日中不暍
處函谷自控帶大河無險阻時平獨往還拜壽觴

屢舉

詠雙杏子其核亦然

子核成雙杏將寄同心人定棲鴛鴦為物豈無
因

和王仲儀楸花十二韻

春陽發草木美好一同時桃李雜山櫻紅白開繁
枝楸英獨步媚淡紫相參差大葉與勁幹簇萼密
自宜圖出帝宮樹聳向白玉墀高絕不近俗直許
天人窺今植郡庭中根遠未可移但欣東風來不
恨和駒遲山禽勿感踏蜂蝶休掇之昔聞韓吏部

為爾作好詩愛陰無織穿就影東西隨公今亦幸
此端坐曾莫疑

目昏

我目忽病昏白晝若逢霧窺驚隻物雙書輒下筆
誤來人髣髴是飛鳥朦朧度紆紆孰辨別此已忘
好惡

送韓八太祝歸京師求醫

少年絜而腴茸茸頷有鬚胃熱跨馬去去去天王
都借問去何謂就醫將疾驅客曰實誑我健壯其
非夫敢告固不給但怪所見愚瘠者未必病病者

未必癯天馬不着肉日走萬里途山熊豈無膏養
體唯恐痛滯結在於內安得形肌膚厥貌雖美好
厥疾勿須更療之欲其漸熾之非愛軀此行不飲
別安得持酒壺

記春水多紅雀傳云自新羅而至道損得
之請余賦

赤羽異蒿鷄來自東夷國群集成臯間翩翩皆一
色舉臆發朱砂為瑞應火德穿屋彼非類啄粟慙
與食清聲殊啁啾所畜每陋逼應當放之去重展
萬里翼

持國遺食

乞食非為貧妻病妾且死晨爨不煖金朝飯亦輟
七遺我我所恤食我所耻我耻曾我求我恤寧
我止應之豈在豐赴義實未鄙漂母殊下鄉為惠
得終始

捫虱得蚤

茲日頗所愜捫虱反得蚤去惡雖未殊快意乃為
好物敗誰可必鈍老而狡夫穴蟻不齧人其命常
自保

同道損世則元補游西湖於卞氏借雙鶴

以觀

塘蒲蔭綠水菡萏艷脩渚想像華亭野但欠鳴鶴
侶同來三四人趣尚頗相與思見此清禽無能覲
翔羽城隅有大第世本官吳楚嘗同太湖石不惜
持金取欲作園林勝園林寧暇觀今當問其家借
賞無吾拒果亦致之來奮毛如喜舞雖生滄海心
翅重不得舉還爾稻粱貪崇丘在何所

送上虞孫主簿

稽山參雲深剡水與天碧行將啼鳥親翫不游鱗
隔況世住新安又嘗為粵客風物知所諳窮幽梯

翠壁

寄題金州孫御史處陰亭

有形則有影畏影當念形日月難久晦處陰乃暫
停光照不復離疾走何所寧當是謂尼父我輩烏
忍聽結廬雖可託夜燭亦熒熒直躬觀罔兩將此
同醉醒

石榴

榴枝苦多雨過熟圻已半秋雷石罌破曉日丹砂
爛任從雕俎薦豈待霜刀判張騫西使時筠醬同
歸漢

七夕

古來傳織女七夕渡明河巧意世爭乞神光誰見
過隔年期已拙舊俗驗方訛五色金盤果蜘蛛浪
作窠

同諸韓及孫曼叔晚遊西湖三首

晚日城頭落輕鞍巢下涼野蜂銜水沫舟子剥菱
黃木老識秋氣徑幽聞草香幅巾聊去檢不作楚
人狂

爍電未成雨涼風先入衣青天忽開影紅日尚餘
暉蛟蝶作團起蜻蜒相戴飛嘲謔不覺夕跨馬月

中歸

舟中演滿意不淺却坐林塘景欲昏翠色蜻蜒立
菱葉青絲腰梟秣城根

韓玉汝遺澄心紙二軸初得此物歐陽永
叔又得於宋次道又得於君伯氏子華今
則四矣

三得澄心紙吾嘗再有詩粗能條本末不復語興
衰堪入右軍跡慙無幼婦辭君家兄弟意將此比
烏然

和主仲儀二首

麝香

游伏栢林下食栢遂生香空知噬臍患豈有周身
防赤豹以尾死猛虎以睛喪儻或益於用捐軀是
其常

凌霄花

草木不鮮行隨生自有理觀此引蔓柔必憑高樹
起氣類固未合縈纏豈由已仰見蒼虬枝上發彤
霞蕊層霄不易凌樵斧誰家子一日摧作薪此物
當共委

七月二十一夜聞韓玉汝宿城北馬鋪

暗樹秋風擺葉鳴
桃枝竹簟冷逾清
孤燈淡淡短
亭客半夜蕭蕭聞雨聲

夢過三陵

山
夢過漢陵間
秋風石馬閑
當年侍臣淚
泣盡向三

詠扇

翦紉成薄質
誰將擬月輪
閔竭夏后德
同我天王
仁及至為時
用豈必美畫
人何憂秋風
來退藏保
其真

送曼叔襄城尉

昔君乘紫騮
來獵荒城下
復乘紫騮去
不逢亭長
罵溪風欲涉
時山雪獨歸
夜此趣信所
詣羈官莫
悲吒

送吳給事自許昌移淮西

直道昔參輔
獨將天下憂
忠言悟明主
退請拜諸
侯坐閣政方
舉移藩心所
求蔡人迎且
喜許俗愛
難留夾路車
徒盛分壇木
黍秋穆陵無
夜閉仁化
自公修

亳州李密學寄御棗一篋

沛譙有鉅棗
味甘蜜相差
其赤如君心
其大如王

瓜嘗貢趨國門豈及貧儒家今見待士意下異盧
仝茶食之無馱飲詠德曾未涯

九月五日夢歐陽永叔

朝鏡惡白髮夕夢對故人常恨道路隔忽喜顏色
親相笑勿問年青銅早傷神雞喙天欲白向者猶
疑真

自尉氏南至京皆水及人脛

陸行畏水深舟行畏水淺河流去時閣涂潦歸時
踐事與時相違我慙行處蹇人生莫為客為客此
安免

九月十六日自許昌迴至京師胥平叔宋

中道迂于郊外

今日至國門二子來迎我適遇信陵塚塚棘秋葉
隨翩翩隨人飛拂馬右或左謂此獨無情亦與吾
意可

裴如晦赴河陽幕

豪風一夜動作雪欲愁客客莫苦嗟行農望明年
麥方來笑語同又是閔河隔主人賢且智不待子
所畫

送韓子華十月拜掃

白露已變霜孝心竟悲惻薦衣如存拜墮不遑息
帶劔蓬池外兼程困馬力禮畢便當還以誠乃為得

送韓六玉汝宰錢塘

予嘗訪林
逖湖上

頃尋高士廬正值浸湖雪雪中千萬峯參差縣前
列僧居或隱見岸樹隨曲折驚鳥如避人遠向寒
煙滅潛希為子男儻得遂踈拙今逾二十年志原
徒切切方聞落君手與我曾未別景多詩莫窮歸
載馱車轍

得曾鞏秀才所附滁州歐陽永叔書答意

客從淮上來徃問故人信袖銜藤紙書題字遠已
認既喜開其封固覺減吾吝新詩不作寄乃見子
所慎向來能如今豈有得觀豐南方歲苦熱生蝗
復饑饉憂心日自勞霜髮應滿鬢知予欲東歸曉
夕目不瞬貧難久待之薄祿藉霑潤雖為委吏冗
亦自甘以進相望未得親終朝如抱疔

追詠崔奉禮小園

前此訪君時已觀堂宇邃安知中屏開自有幽林
致花零崑桂紅石擘雲根翠正當秋風來不見搖
落意日得吟其間何須去為吏

宋中道快我生女

爾嘗喜誚予生女竟勿怪今遂如爾口是宜為爾
快亦既以言酬固且殊眦睚慰情何必男茲語嘗
自戒

詠宋中道宅櫻櫚

青青櫻櫚樹散葉如車輪擁捍交紫髯歲剝豈非
仁用以覆雕輿何憚尅厥身今植公侯第愛惜知
幾春完之固不長只與薺本均幸當勅園吏披割
見日新是能去窘束始得物理親

詠秤

聖人防爭心衡權為之設後世失其平有星徒爾

列物物尚可欺銖銖不須別將淳天下民安得必
毀折

詠象韓子華邀賦

軀大力無用遠物賞馴柔食芻與飲水百倍於馬
牛猶能絡金羈不可伏車輶蒼舒曾智秤千鈞空
鑿舟

依韻荅惠勤上人

釋子本樂靜宜不事物牽我慙姑蘇守復賞杼山
然三歲與之別其學已增前忽此有來贈老拙謬
耽研

答顯忠上人

驅馬傍馳道歸自許西偏高車非舊貴立避槐樹
邊心雖欲往謁僕餒行不前是甘處窮巷晨笑微
生煙儻有好事者扣門與留連或出袖中詩語熟
氣頗全曾不類緇褐始可令勉旃京師百許寺知
幾相差肩

送韓仲文奉使

往使兒奴國持節豈辭遙朔北正苦寒風汝與雪
飄燕山何處是漢銘應已銷前車渡冰河後騎鳴
金鑣行行至穹廬尊我不敢囂玉爵親獻酬名裘
進狐貂禮成復命日苑柳舒楊條

送劉司勳奉使

授命出絕域北至單于庭馳鳴沙磧遙馬倦朔雪
零幽州古道上胡笳應夜聽嘗聞昔時語南看北
辰星使回儻可記乃得驗天形

依韻和歐陽永叔秋懷擬孟郊體見寄二首

我居西北地秋無東南風木脫不塞望高臺空九
重音塵安可得鴻鴈鳴霜中日看紫苔生乃見三
經窮一聞離騷篇寫盡楚客曾曾懷如寶匣夜夜
吼生銅

秋思公何高堆積自崿崿出為悲秋辭萬仞見孤
聳念我老於詩我髮實種種而後傷故人故人多
作塚陰風夜木嗥窸窣聞鬼悚獨我忘形骸百事
乃纖冗不眠霜月上霜月如可捧

裴如晦自河陽至同韓玉汝謁之

朝聞單騎歸徑走至其第扣門童僕頑拒我色甚
戾不顧遂登堂有馬堂下繫辨詐大呼卿稍應西
屋際逡巡冠帶出青綬何曳曳有似縮殼龜藏頭
非得計況與二三子交分久已締怨爾避客尤新
還復新婚

詠王宗說園黃木芙蓉

水中兼木末相擬有嘉花玉蘂圻蒸粟金房落
晚霞涉江從楚女采菊聽陶家事與離騷異吾將
塞以誇

二馬

舊馬十年跨老劣多緩行新駒三萬錢頗愛舉蹄
輕不使異芻秣均養存其情君門趨早朝風勁力
已生

依韻和發運許主客詠魚

苔影陶潛興長吟為我聽與之相遇日曾不異於

形動靜隨生趣存藏委曜靈莊周疾走意推本
置諸銘

寄題周源貞外衢州萃賢亭

昨朝江南客語子川亭上有時飛雨來不見前山
青卉夢人未識鳥響音日可聽既將遲賢者無使童
僕局

荅楚僧智普始與吳僧顯忠來過今見二

人詩進於舊矣

我初見子時子作楚人語復與吳客來音俱變齊
魯乃知久處益薰猶可同舉更當富於學茲言

聊以補

鴨雛

春鴨日浮波羽冷難伏卵嘗因雛抱時託以雛窠
暖三旬殼既坼乳毛寒脰短雛寧辨其雛翅擁情
欸欸一日向水涯所稟殊未斷泛然去中流雛呼
心憲憲人之苟異懷負義不足算有志在養毓勿
論報德限

有覩十一月七日

來恨我馬遲去恨我馬疾馬蹄塵作雲已隔粲然
質時時顧且遙亂緒如有失

宛陵先生文集卷第三十

宛陵先生文集目錄卷第三十一

杜挺之贈端硯

謝冲卿示持國詩卷

重修孔子廟記

席中賦葡萄

夜聽鄰家唱

和次道金橘

送韓持國歸許昌

送韓持國

遲月

風笛

霜鍾

鳴琴

和光道屏中六鶴

聞子華見訪

送丹陽宰李國博

食薺

甘陵亂

夜飲席上賦松子

送李殿丞歸河陽
送王寺丞歸南京

李審言學士遺金波酒

對雪憶訪林逋
元日朝

荅祖擇之遺墨
對殘雪懷永叔

和中道元夕
寄題碧雲堂

李國博遺薑茗
送臨江胥令

寄題滁州醉翁亭
夜夢

賜緋魚
和荅韓子華餉子魚

和荅韓奉禮餉荔枝
張氏納婦

酌別謝判官兼懷永叔
京師延慶曆八年春
盡夏五月楚州道中

和永叔聞百舌
送陶太博廣信倅

荅王太祝卷
雨賦

送張太博袁州倅
和宋中道夜雨

書裴如晦集後
見胥平叔

宣麻
朧月

兵
泥

聞韓仲文使歸
未晴

夜陰
夜晴

古鑑
橐駝

庭老許遺結絲勒帛

貧

行僧

目錄終

宛陵先生文集卷第三十一

杜挺之贈端溪圓硯

雪壓古寺深中有臥病客訪之語久清飢馬齧
栢按頭蠻溪硯其狀若圓璧指此欲為贈而將助
吟席非意予敢貪既拒頗不懌大出者中有素許當
自擇強持慰勤心婦以示朋戚哂曰豈其然為汲
寒泉滌滌彼僞飾物紙乾見頑石清晨走髯奴無
厭願求易拜賜遂如初明月懷吞蝕微分鸚目瑩
尚漬墨花碧詞答謂我愚悔復料已逆明日未央
朝執手笑啞啞

吳冲御示和韓持國詩一卷輒以為謝
葉公所好者熟已識頭角一日真物來駭汗沛且
渥我初見韓子蜿蜒噴雷雹子復蛟龍文氣象不
可捉畏懷但驚顧得與前事較

新息重修孔子廟記

新息古邑也自漢以來幾因亂而孔子之廟歲享
不絕于今雖邑宰有賢否祀典繫國家也儻不賢
屋廡不葺有矣祀其廢諸慶曆七年清河張君伸
為是邑始勤於治民謹於條約恪於事上既而民
信訟且簡乃脩孔子祠及祭器子未知君之果學

耶學而果知道耶以斯舉則君似有本者學者未
必信奉如之嗚呼孔子之道與天地久與日月昭
一郡一邑之廟不足以光顯厥德報厥功也略究
為郡邑之人少誦其書長就其藝遂得其祿忍負
不為一出口之勞完其廟至使瓦墮簷風雨壞桶
甃缺階塵昏像犬豕穴墻垣往來其間哉新之無
是患庶幾賢已然則苟因為利廣爾官俾不肖有
說非予望於君也况邑隸蔡守吳公輔臣大儒名
重天下聞君能是得不樂耶予思昔忝邑時見邑
多不本朝廷祭法往往用巫祝於傍曰牛馬其肥

癘疫其銷穀麥其豐瀆悖為甚予即革之君觀有
若是者當改為以從著式云

范景仁席中賦葡萄

朱盤何纍纍紫乳封霜厚今為馬谷繁昔釀梁州
酒乃知西土珍漢使傳應久

夜聽鄰家唱

夜中未成寐鄰歌聞所稀想像朱脣動髮鬢梁塵
飛悞節應偷笑竊聽起披衣披衣曲已終窻月存
餘暉

宋次道得廣南金橘為餉且有詩因和酬

越橘如金丸爛然已盈筐誰傳嶺外信尚帶霜前
葉莫嫌道路遠得與樽俎接主人無吝心懷歸予
敢輒

李廷老席上送韓持國歸許昌

得早字

馬蹄踐霜華遊客歸何早重裘不畏寒况復非遠
道誰言未顧期登第髮如葆解裝喜可知月下金
壺倒

送韓持國

曰予非才敏乃與世寡游三四洛陽友過半已成
丘晚節五六人文行皆潔修韓氏棣萼盛於我為

薰猶君比衆最篤我唱君非酬昔我竹軒下破窓
風颭颭君時不厭過逍遙談未休頗為俗士憎恬
不防吝尤邇來我還都君亦辭舊州舊州君所隱
安得此久留雪晴命駕歸使我生悲愁誰見漢水
上定更不驚鷗

遲月

遲月月已上清光在高木未能照我庭團團隔東屋
風笛

既殊出塞聲還非江上聽夜吹送悠揚高樓月方
迥

和鍾

昔向寒溪臥遠寺撞白雲今也趨早朝殘月馬上
聞

鳴琴

雖傳古人聲不識古人意古人今已遠悲哉廣陵
思

和曹光道詠直廬屏中六鶴

漢家為瑞雙黃鵠只道飛翻太液池不似雲屏六
畫鶴帝宮深處有人知

晚歸聞韓子華見訪

門外多車騎後迹亂前蹤誰識此來過塵蹄重復
重歸有野僕言恨不故人逢豈無肴酒設所向乘
所從未能一往見懶拙其必容

送丹陽新守李國博歸洪州 寬

蔡水冬不枯唯愁夜水結歸舩及暖下窮臘未飛
雪淮潁地漸偏川上雲常泄幾日接春波南風楚
江徹拜親懷郡章予慕嗟才劣

食齋

世羞食齋貧食齋我所甘適見採齋人自出國門
南土蠹瘦鐵刀霜亂青竹籃携持入凍地挑以根

葉參手無名自食此尚可慙肥羔朱尾魚腥羶徒
爾貪

甘陵亂

甘陵兵亂百物灰火光屬天聲如雷雷聲三日屋
瓦摧殺人不問嬰與孩守官奔走歲浮埃後日稍
稍官軍來圍城幾匝如重鉞萬甲雪色停皚皚孰
敢專輒但取裁黃土始堅難速頽

夜飲席上賦松子

風松有霜子吹落幽人庭幽人畏狼籍日掃出巖
扃誰將稱遠物乃信涉滄溟

送李審言駁丞歸河陽

大河冬合時上可馳車馬
婦子從橋安黃流在冰
下况命使於家其美世為寡
是宜飭以行慰此懷
慕者

送王宗說寺丞歸南京

晏歲欲飛雪滿天含凍雲
犯寒單騎速獵吹紫裘
薰庭鵲還先喜池鴻去始聞
公應問貧賤善說莫
如君

李審言將歸河陽值雪遺金波酒

朔吹卷天吼遠郊無鳥飛
忽驚開戶白昨夜打窓
微闇巷我方懶關山君獨
歸翻能寄醇酎為此解
寒威

對雪憶往歲錢塘西湖訪林逋三首

昔乘野艇向湖上泊岸去
尋高士初折竹壓籬曾
礙過却穿松下到茅廬

旋燒枯栗衣猶濕去愛峯
前有徑開日暮更寒歸
欲懶無端撩亂入船來

樵童野犬迎人後山葛棠
梨案酒時不畏尖風吹
八牖更教床畔覓鷓夷

元日朝

萬國諸侯振玉珂踏雲朝會雪初過欲聞鳳管天
造度數聽雞人樓上歌放仗旌旗方偃亞迴頭宮
闕更嵯峨謬陪王屬曾何補泛泛慙同上下波

答祖擇之遺新羅墨

海上老松死霹靂燒瘦龍胡人犀皮膠團煤煙膏
濃色奪陽為翅來涉溟渤重君獲乃為贈我謬蟲
鳥蹤且作異土玩不愧西域節

對殘雪懷歐陽永叔

窮臘一尺雪跨春氣逾嚴童僕苦病瘵庭戶無與
杳日消夜復凍霰積泥相醜懶出獨懷遠何由寄

江帆

寄題時上人碧雲堂

望望佳人來未來雲已暮當時千里恨不獨看雲
故何此啓虛堂定知吟秀句還會古人心古人非
特賦

和宋中道元夕二首

結山當衢面九門華燈滿國月半昏春泥踏盡游
人繁鳴蹕下天歌吹喧深坊靜曲走車轅爭前闢
盛亡卑尊覲粧屢服何柔温交觀互視各吐吞磨
肩一過難久存眼尾獲笑迷精魂貂裘比比王侯

孫夜闌鞍馬相馳奔

春風來解吹殘雪燈燭迎陽萬戶燃竟看繁星在
平地不妨明月滿中天赭袍已向端門御仙曲初
聞法部傳車馬不閑通曙色康莊時見拾珠鈿

李國博遺浙薑建茗

吳薑漬吳糟越茗苞越擇咀辛聊采盃啜味可奴
酪但拜故人貺何言為物薄我心易厭足不比填
窮壑

送臨江胥令

初從桃源遠却向竟陵去今作中州官山水不曾

飲且當傳竹枝莫學乘籃輿雲木杜鵑時千崑響
行處

寄題滁州醉翁亭

琅琊谷口泉分流漾山翠使君愛泉清每來泉上
醉醉纓濯潺湲醉吟異憔悴日暮使君歸野老紛
紛至但留山鳥啼與伴松間吹借問結廬何使君
游息地借問醉者何使君閑適意借問鑄者何使
君自為記使君能若此吾詩不言刺

戊子正月二十六日夜夢

自我再婚來二年不入夢昨宵見顏色中夕生悲

痛暗燈露微明寂寂照梁棟無端打窓雪更被狂風送

賜緋魚

蹉跎四十七腰間始懸魚茜袍雖可貴髮短齒已踈兒女眼未識競來牽人裾不知外朝衆君恩慙有餘

和答韓子華餉子魚

南方海物難具名子魚珍美無與并完鱗全乙異臭腥素盞清曝生花輕其頭戢戢筠篋盈出自通印時所評遠涉川陸來都城親賓交遺已見情食指嘗動吾竊驚果獲異味亦足明

和答韓奉禮餉荔枝

韓盛人所希四海饋名物韓復未踈予分珍曾不一莆陽荔子乾皺殼紅釘密存甘尚可嘉本味固已失遙思海樹繁帶露摘初日安得穆王駿能置萬里疾

閏正月二日夜張氏納婦 大素子

婚姻貴及時周有標梅詩雪後花將發人歸室且宜坐中傳漏鼓戶外轉星旗環佩遙聞出當脩廟見儀

酌別謝通微判官兼懷歐陽永叔

識君童稚時而今君齒壯不見二十年顏貌已非
向親戚多零落欲語還悲愴更問平生交久從滁
水上君又滁水歸寄音傾桂釀儻復二十年吾馬
保無恙

和永叔郡齋聞百舌

響舌能令百鳥羞聽時丹杏發山郵春雲不定雨
來急濕翅蒼茫高樹頭

送陶太博通判廣信軍

平時易水頭不復起邊愁壯士去來久寒波空自

流臨塘遺鷺羽隔戍見羶裘半似江南美軍和賸
宴游

答王太祝卷整

朝迴泥塗不可出飢馬倦僕驅之頑閉門獨與古
人語黃卷未終聞扣關賢哉公族有來顧詩袖大
篇令我刪珠光玉瑩絕瑕類強欲指擿徒羞顏自
同培塿最淺狹安得與子論丘山

雨賦

春雨之至兮風呵而雲導在上為膏在塗為淖被
末漸本潤萬物者歟施及天下不收報者歟入波

而隨流因積而成潦專好而失道者歟壞瓦漏屋
蒸菌出水過而為酷者歟朝使人愁夜使鬼哭迷
而不知復者歟將告之雨雨無聽也將告之天天
且復也窮居知命是何病也噫

送張太博通判袁州

君非身尤謫南州南方尚鬼其俗媮蛇為鄰虎為
取丹茅苦竹深幽幽邑人祠鬼拜古樹竹杯一仰
來烹牛牛死齧懼常不幸誰得禁止專鋤鉤借曰
未信君且往民將語怪君聽不仰山頭有行舟

依韻和宋中道雨夜

暗驚料峭寒春雲兼春雨知勝早朝人閑眠不開
戶丘壑豈無容泥塗還自取誰吟何遜詩不覺逢
逢鼓

讀裴如晦萬里集書其後

君自萬里迴遂成萬里集其詩二百篇文字必已
立定應伴前人未嘗有蹈襲古溪鑿鐵刀出塚土
花澁誰將飾以玉鐺上光熠熠宋子序其端精悍
孰甜繁搜新造空蒙俗眼不得入示予要賦之短
戈慙後執

見胥平林

歷君門兮九重雲黝黝兮欲雨隱翠慕兮觀予心
眷眷兮不語

宣麻

彬美下一國會無相印酬莫驚除拜峻自是戰功
優壯士頗知勇諸儒方貴謀淮西封亦薄裴度死
生羞

朧月

夜晴初見月雲薄未分明高樹尚無影遠鴻時有
聲下階嫌履濕閉戶認苔生窸窣墻陰暝更長已
漸傾

兵

太平無戰陣漢卒久生驕金甲不曾擐犀弓應自
調嗟為燎原火終作覆巢巢若使威刑立三軍豈
敢驚

泥

一夜添春雨中衢長舊泥履粘憂折齒馬滑畏顛
蹄去啄從江鶴相呼任竹雞朝來放朝請始與逸
人齊

聞韓仲文使歸

傳道使車迴柳條黃未開曉寒非絕漠春色近章

臺名馬北方至賓鴻南國來明朝齋被見天子始
稱才

未晴

未晴初止雨蒸潤尚侵衣缺月如羞出荒雲不有
歸杏花未欲綻梅萼雪將稀遠鴈來何急衝風濕
翅飛

夜陰

月色明還暗雲寒散復濃古堂移暍暍積霧合蛟
龍濕菌飛螢出蒼苔上朽重獨吟嗟向老氣遊覺
偏慵

夜晴

新晴月正明頻聽夜鳥驚未向高枝穩時為繞樹
聲群飛自紛泊衆鳥不屏營躁靜於焉見誰能度
物情

古鑑

古鑑得荒塚土花全未磨背菱尖尚在臯獸角微
訛月暗蝦蟇蝕塵昏魍魎過但令光彩發表裏是
山河

橐駝

鳴駝出西域銜尾自連連漢驛凌雲去胡人踏雪

牽常時識風候過磧辨沙泉老覺肉封側猶蒙錦
帕鮮

李庭老許遺結絲勒帛

紉絲作長帶正勝茱萸紋冉冉仍垂緋
綵綵自有薰鮮華非稱我修飾未如君曾不日來取賢哉知
禮云

貧

生甘類原憲死不學陶朱但樂詩書在未憂鍾鼎
無恥隨波上下難免鬼歔歔陋巷曲肱者終朝還
似愚

行僧

風衣何揭揭有若楓葉翻塵土不遠去白雲藏石
門

